


TEZAUUR LITURGIC
26 AUGUST

SLUJBA
SF. CUVIOS
CIPRIAN
DE LA
STOROJEN



MOSCOVA, 2000



Августа в 26-й день Служба преподобному Киприану Стороженскому

На велицей вечерне

Стихиры на Господи, возвах: глас 4.

Подобен: Званный свыше:

Егда Божественное звание, / чрез преподобнаго
Андрея явленное, / прииде на тя, отче
Киприане, / тогда вся дела нечестиваго
промысления разбойническаго оставив, /
Вышних благ всеусердно взыскуя, / не возвратно
Христу последовал еси; / крест отшельничества
на рамо взем, / в пустынном житии и покаянии
глубоце ревностно подвизался еси. / Темже
ныне достойно со святым наставником твоим
Троицу воспеваеши присно; / Юже моли
даровати спасение верою чтущим тя.

Егда Божественное рачение / найде на тя,
блаженне отче Киприане, / тогда Святым Духом
движимь, / тяготы и болезни многия на берегах
Ладожских претерпе, / бодрость духа и
сострадание к ближним во всяких обстояниях
сохраняя, / к полку мужей преподобных волею
сопричтался еси; / с нимиже ныне вкупе пред
Лицем Божиим предстоиши во славе / и молиши
даровати Христианския веры утверждение / и

душам нашим спасение.

Егда Божественное желание / достиже тя,
преславне отче Киприане, / тогда
затворничество остави, / в полноцней стране
Ладожстей забывшим Бога проповедал еси, / от
тьмы тех к свету богоразумия настави. / Многия
козни вражеския поправше, храм благолепен и
обитель возведе, / молитвами и поучении храмы
душевныя неустанно созидаше. / Темже и
венцем небесным Христос, / Емуже неленостно
поработал еси, венча тя; / Егоже моли спасти и
просветити души наша.

Иныя стихиры, глас 8:

Все отложив мирское пристрастие, преподобне,
и крест твой на рамо взем, чистым и
немятежным умом Христу последовал еси: в
пустыни, яко в раи, живый, Тому угодил еси,
яко безплотен, на земли жительствуя, постом и
молитвою, и всенощными стоянии страсти
умертвил еси, молчанием же и богомыслием
Богу соединился еси, Егоже моли о душах
наших.

Тихое и безмятежное житие пожив, в месте
безмолвнем уединяся, непрестанною молитвою
Всемилосерднаго Господа прославил еси и ниву
твоего сердца богато нетварною благодатию
напоил еси, богомудре Киприане, тем и Святаго

Духа вместилище показался еси и плод
сторичествующ принесл еси, угодниче Христов,
молися убо выну ко Господу о душах наших.
Приидите, празднолюбных соборы, приидите,
возвеселитесь с нами, и лик составльше,
торжествуим: се бо наста всепразднственная и
светоносная память богоносного отца Киприана
и светлаго миру светильника, нам же
превозделеннейшаго ко спасению наставника,
и о всех теплаго предстателя, молитбо ся выну
ко Господу дароватися всем велией милости.

Слава, глас 6:

Днесь созывает нас преподобнаго отца нашего
Киприана торжество; / приидите убо,
празднолюбцы, / светло празднуем в память его,
глаголюще: / радуйся, светильниче
многосветлый, / возводя ко Христу множества
просвещенных тобою; / радуйся, обители твоя
и всея земли Ладожския похвало и удобрение, /
и всех верных благоутишное пристанище и
крепосте; / радуйся Христа ради многия
подвизи и труды подъявый, / с Нимже ныне
присно пребываеши в радости, / Егоже моли,
отче благомудре Киприане, / избавити ны от
видимых и невидимых враг / и спасти души
наша.

Вход. Прокимен дне, и чтения
преподобническа.

На литии стихирь, глас 1:

Силе благодати от уст твоих исходящей, / вси
внимающий словесем твоим дивляхуся, / и
тобою проповедаемому Христу от души
вероваша: / Егоже моли, премудре отче
Киприане, / спаситися нам, священное твое
торжество совершающим.

Божие величие богодухновенно постигл еси, / к
познанию во Святей Троице Единого Бога
многия люди, в суете и забвении
жительствовающия, привел еси, / потрудишя над
преображением своея души понуждая; / аще
вся силы направити ко очищению сердца
потщитяся. / Темже и мы, духовныя чада твоя,
/ яко наставника благочестия и покаяния
богатоплоднаго любовию воспевающе молим тя;
/ научи ны выну пред лицем Божиим ходити.
Светом невечерним Святыя Троицы
просвещенный, ношь житейскую без
преткновения прошел еси, богомудре Киприане,
видении Божественными возвышаяся, во
дворах Бога Вышнего вселился еси. Темже и нас
наследники Того содей, святую твою память
почитающих.

Слава, глас 6, самогласен:

Наста, всехвальне отче наш Киприане,
светлейший солнца твой праздник, в
прославлении твоём; с преподобным Андрианом
и всеми святыми Российской земли, в храме,
егоже воздвигл еси, ликующе воспеваем тя. И
ныне вкупе с ними молися ко Господу, спаситися
душам нашим.

И ныне, Богородичен:

Богородице, ты еси Лоза истинная,
возрастившая нам плод живота; тебе молимся,
молися Владычице со святым Киприаном
помиловати и спасти души наши.

На стиховне стихиры, глас 6:

О, преблаженный отче Киприане, благодати
Духа Всесвятого в сердце своем предивный
носителю и пламени любви Божией сосуде
неистощимый, к тебе припадающе, взываем: не
престай и ныне умоляти Творца Нашего Церкви
Святей от зол избавление даровати, людем же,
соблазны греховными обуреваемым, мир и
велию милость.

Стих: Честна пред Господом смерть
преподобных Его.

Преподобне отче Киприане, кто восхвалит труды
и болезни твои, что подъял еси ради Царствия
Небеснаго? Яко явил еси образ терпения и

смирения, кротости и воздержания, целомудрия и послушания, и тако обогатил душу твою и стяжал еси дары Духа Всесвятого, Имже всякая душа живится

Стих: Праведник, яко финикс, процветет, и яко кедр, иже в Ливане, умножится.

Святой угодниче Божий, веры Христовой ревнителю, сосуде благодати избранный, дивным житием твоим страна Ладожская прославися, и вся Церковь Христова возрадовася, яко в тебе все мы стяжахом стену и утверждение, и ныне, угодниче Божий, молися присно ко всемилостивому Господу, да спасет души наша.

Слава, глас 4.

Подобен: Яко добля:

Взыскующих Христа окормитель и кормчий, / столп благочестия и веры поборник, / ты, старче богомудре Киприане, апостольски зывал еси: / ничтоже ны разлучит от любве Божия; / худшее, братие, покорим лучшему и плоть поработим духу. / Темже явися светильник Церкви, не под спудом, но на свещнице поставлен; / да прославят Бога вси видящии дела твоя.

И ныне, Богородичен.

Тропарь, глас 2:

В молитвах теплый заступниче / и просящим скорый послушателю, / преподобне отче наш Киприане, / прими моление наше, / и Христа Бога моли помиловати нас, / тя во святых прославляющих.

Ин тропарь, глас 6:

Покаянием богатоплодным свою жизнь изменил еси, / и непрестанною молитвою и трудами велиими обитель воздвигл еси, / победил еси бесовское ополчение смирением, / Киприане, отче наш, // моли Христа Бога спасти души наша.

На утрени

По 1-м стихословии седален:

В духе Евангельских заповедей и покаянии воспитав свою душу, явился еси делателем неленостным на ниве Христовой, избранниче Божий преподобне отче Киприане, все упование на Единого Бога возложив, благодатию тебе данною преуспел еси во учении и доброделании.

Слава и ныне, Богородичен:

По 2-м стихословии седален:

Мужественное показал еси души твоея мудрование, / человеческое разумение оставль, / Высшей Премудрости ум, волю и чувство

покорил еси; / темже вшедше в Небесная, / просвети, отче наш Кприане, благодарным сердцем тя восхваляющия.

Слава и ныне, Богородичен:

Хвалу принесем, вернии, Матери Бога нашего, и любовьию вземшеся, воззовем согласно, ангельски вопиюще к Ней: радуйся, Благодатная Дево, рождшая спасение душ наших.

По полиелее седален:

Евангельское учение о Царствии Божии, иже внутрь души человеческой должно утвердися, неразумющим ясно изъяснил еси, стрелами глагол твоих поражая ленивыя и теплохладныя; воздвигни и ны подвизатися во брани невидимой.

Слава и ныне, Богородичен:

Удивишася, Чистая, вси ангелов чини и человеческая множества таинству Твоего рождения страному: како бо неискусомужная Млекопитательница еси и держиши на руку Твоею Питающаго всю тварь и Содержащаго. Темже вопием Ти: Богородице Приснодево, моли Сына Твоего грехов оставление даровати верою поклоняющимся пресвятому рождеству Твоему.

По 50-м псалме стихира, глас 6:

Таинственны пути Божественнаго призвания: /
како разумеем сие, / глас Господень како
восприимем? / Ты же услыша зов Божий, / абие
оставих вся прежняя дела и промышления твоя
во вслед Христу идоша, / верный служителю
Христов, / преподобне отче Киприане
Стороженский; / моли и нам стяжати мужество
побороти плотския страсти / и лестныя помыслы
присно побеждати, / дабы достойно
приуготовити ся ко сретению со Христом.

Канон, глас 4.

Песнь 1

Ирмос: Колесницы фараоновы и силу его /
вверже в море крепкий во бранех. / Воспоем
песнь новую, яко прославися.

Вразуми ны от Божественнаго свыше
промышления, воспети тя достойно, преподобне
отче Киприане, покровителю наш
многомилостивый.

Приклоншися Христовым Божественным
законом, сладостей стремления в покаянии
твоом всеблагоплоднем отвратившися, всякую
добродетель всеблагоговейно, яко едину,
исправил еси.

Всем сердцем притекл еси Христу, спасительный
узкий путь избравше, и пустынных отец житию

поревновавше, чисте совершающе Единого Учителя Божественныя заповеди.

Богородичен: Светлый Ты и святой храм Владыци всех, Богоотроковице, с лики безплотных воспеваю радостно, без истления Бога Слово рождшую.

Песнь 3

Ирмос: Лук сильных изнеможе, / и немощствующии препоясашася силою, / сего ради утвердися в Господе сердце мое.

Сияние святости преподобнаго Андриана, яко свет фаворский пронзи сердце твое огнем Божественным, егоже потщався не угаси, но на свещнице возвыси, даже и Ладожския страны свет той достигл еси.

Вслед Христа последовал еси радующеся, носящи крест свой на раме, мысленный рай показался еси, отче, произращая различных добродетелей цветы, плоды красны своему Владыце принесл еси, украсившему тя чудесы. Землю Ладожскую, яко апостольский жребий приемши, Христа проповеданием, неустанною молитвою, храмов возведением и благоустроением обители новосозданныя, светолепно украсил еси.

Богородичен: Надеждо и Предстательство Тебе поющих, яко Владычица Чистая, Пречистая

Богородице Дево, едина Всепетая, моли во еже спастися нам.

Ин кондак, глас 2:

Яко примеру спасительному разбойника
благоразумного и раскаявшегося последовавше,
/ чистотою душевною вооружился еси и
последовал еси Христу Богу, / болезнующая всем
сердцем о всех, с верою притекающим к тебе; /
ныне же смирению, терпению и любви
научаеши ны, / сего ради почитаем тя,
преподобне отче наш Киприане, // и на тя по
Бозе и Богородице упование свое с надеждою
возлагаем.

Седален, глас 8:

Молитвами твоими, отче преподобне Киприане,
возстави ум и волю, помраченнии страстьми, да
в разум приидем и завет со Христом
нелицемерным покаянием обновим.

Богородичен:

Богородице Дево, христиан всех всенадежное
упование, спаси мя, отчаяннаго, о Мати
милосердая, оживи душею умершаго, жизнь
всех рождающая. Живоносный источниче, напои
мя умиления водами, зноем страстей люте
опаляемаго, да покаяния слезами прохлаждаемь,

благодарно воззову: слава, Владычице,
всемощней силе Твоей.

Песнь 4

Ирмос: Сей Бог наш от Девы воплощся / и
естество обожив, / Егоже воспевающе, вопием:
/ слава силе Твоей, Господи.

Яко соние, яко цвет, время жития течет, что
всуге мятемся? — вопрошаеши отче, ко
обновлению души силою покаяния призывающе.
Твоих исправлений высоту и глубину смирения
безмерную кто сказати доволен, преподобне отче
Киприане приснопамятне; Просиял бо еси, яко
светило, в российстей земли, осиявая
монашествующих соборы добродетелей твоих
светлостию.

Безмолвия воистинну был еси любитель, отче
приснопамятне, и пустыни гражданин
преизряден, и яко древо, насажденное при
водах, еже плод дает во время свое, точиши бо
исцеления с верою призывающим имя твое и
чтущим от любве всеосвященныя твоя подвиги.

Богородичен: Непостижимаго Бога, Сына и
Слово, несказанно паче ума рождшая, моли,
Заступнице наша, Богородице, согрешений дати
нам прежде конца прощение, и Царствия
Небеснаго достигнути.

Песнь 5

Ирмос: Возсияй ми, Господи, свет повелений Твоих, / яко к Тебе дух мой утренюет и поет Тя: / Ты бо еси Бог наш, / и к Тебе прибегаю, Царю мира.

Рассеянного жития нашего губительное течение исправи, старче мудрый Киприане; покаяния бо и трезвения ты еси таинник и делатель на ниве Христове преизрядный.

Имея тя помощника, старче богоблаженне, законы Царствия Небеснаго: Богообщения, любви и чистоты, молитвою, незлобием и целомудрием в сердце утвердим.

Преподобне Киприане, отеческая похвало, не престай моляся, предстоя Троице

Пребожественней, даровати разум и силу зрети и побеждати страсти душевныя, предстателя тя Божественнаго, призывающим.

Богородичен: Неизмерна глубина любве и милосердия Твоего, Мати Божия и человеческого рода Заступница верная, не остави до конца в бездне прельщений погибающих, ко пристанищу спасительному таинств церковных направи.

Песнь 6

Ирмос: Морское рыдание, Христе, Ионино / подражаяй, зову Ти: / живот мой от ада прегрешений возведи, / да во храме славы

Твоея / со гласом хваления пожру Ти.
Господни заповеди исполняя, кроток и незлобив,
отче, был еси, смирен и прост, и во всех
добродетелех благоискусен, тем и Святаго Духа
орган явился еси, премудре, научая и вразумляя
чада твоя достойно ходити во след Христу, во
смирении Тому служащим спасение подающего.
Обратися, покайся, открий сокровенная,
глаголи Богу, вся ведущему, тайная твоя; да
подаст ти силу победити плотския страсти, -
такое заповеда творити нам старец богомудрый.
Егоже возлюбил еси, Егоже возжелел еси, Егоже
ради гонения претерпел еси, исповедниче отче
Киприане, моли ныне Христа от незаходимых
глубин греха и отчаяния нас избавити.
Богородичен: Пречистая Владычице,
Богородительнице, Надеждо к Тебе
притекающих и Пристанище сущих в бури,
Милостиваго и Создателя и Сына Твоего
умилостиви молитвами Твоими.

Кондак, глас 8:

Огнь святости старца Андриана преобрази душу
твою светом фаворским, / возводя тя к
Божественней высоте. / Яко злато в горниле
покаяния всецелаго и плодоноснаго очищен,
земли Ладожския украшение явился еси; /
темже молим тя: молитвами твоими от всяких

ны бед спасай, да зовем ти: / радуйся,
преподобне отче Киприане, богомудре.

Икос

Како познаем тайну святости твоя, преподобне отче? В мире, враждующем на Христа и Церковь Святую Его, сыновом избивших пророки како мощно проповедати Христа распятого? Токмо евангельски возлюбив, и разум Божественный превыше всего поставив, благоразумевающе о непостижимых тайнах промысла и неизследованней глубины милосердия Отческаго. Темже, покланяющесе неведомому нами подвигу твоему, вопием ти сице:
Радуйся, от Бога богато талантами одаренный;
Радуйся, сторицею тии умноживый;
Радуйся, ангельскаго жития подражателю;
Радуйся, древних великих отец житию приемниче;
Радуйся, невидимых врагов мужественный победителю;
Радуйся, заповедей Божиих хранителю усердный;
Радуйся, добродетелей чистейшее зеркало;
Радуйся, Духа Святаго сладкогласный органе;
Радуйся, образе глубокаго смирения;
Радуйся, ревностный исполнителю Божественных делей;

Радуйся, яко тобою научихомся непрелестным
путем жития ходити;
Радуйся, яко твоим за ны ходатайством
спасение получитьи надеемся;
Радуйся, завет с Богом возобновляти
побуждавый;
Радуйся, землю Ладожскую учением Христовым
напоивый;
Радуйся, людем во тьме сидящим, свет
старчества явивый;
Радуйся, преподобне отче Киприане, богомудре.

Песнь 7

Ирмос: Юноши три в Вавилоне, / веление
мучителево на буйство преложше, / посреде
пламени вопияху: / благословен еси, Господи, /
Боже отец наших.

Яко дерзновение имый ко Господу, преподобне,
разрешение от уз лицемерия, тщеславия,
самоmnения помози обрести молитвами твоими,
да сокрушенными сердцама воспоим:

благословен еси, Господи, Боже отец наших.

Яже в мире мужественно поправше временная
вся, бодрствовал еси в молитве, богомудре отче,
ныне же ликуеши с воинствы Ангельскими,
воспевающе: благословен еси, Господи, Боже
отец наших.

Добродетельною твоею силою, верою крепкою,

терпением многим, светоносне старче,
приятелище был еси Святаго Духа, славяще
сице: благословен еси, Господи, Боже отец
наших.

Богородичен: Яко роса найде на Тя Дух Свят, и
не опали чрева Твоего, Пречистая, огонь
Божества, и роди Сына, всех Бога; Емуже поем:
благословен еси, Господи, Боже отец наших.

Песнь 8

Ирмос: Всяческая носяй неприступною Твоею
силою, Христе, / преподобныя Твоя отроки в
пламени оросил еси, зовущия: / благословите вся
дела Господня Господа.

Сиянием добродетелей озаривше ум, отче
Киприане славне, благоугодну жертву Богови,
словесное служение принесл еси, благодарно
поя: благословите вся дела Господня Господа.
Скорбную и тесную шествовав стезю, высотой
добродетелей уяснивше душу, Небесную достигл
еси жизнь некончаемую, идеже Свет
безконечный есть Христос, со ангелы поеши:
благословите вся дела Господня Господа.

Буди, отче всечестный, заступник непобедим,
избави от отчаяния и малодушия, укрепи в
преданности воле Благой мольбами твоими ко
Господу, поющих: благословите вся дела
Господня Господа.

Богородичен: Поем Тя, величаем Тя,
поклоняемся Ти, Пречистая, яко Безначальныя
Троицы породила еси Единого Христа Бога,
темже отверзла еси нам, сущим на земли,
Небесная.

Песнь 9

Ирмос: Безсеменное Рождество Твое,
Богородице Чистая, / Христа Бога нашего /
песнями немолчными величаем.

Новый благодетельный в полноцней земли источник
явился еси, богоносе, струи исцелений изливая
от святого твоего гроба верою несумненною
притекающим к тебе, покровителю наш, мы же
веселия исполняеми, тя прославляющаго Бога
славим.

Славы текущая и тленныя возгнушався,
богомудре, славу и жизнь наследовал еси
блаженную; Христа моли сохранить верность
Ему и нам, совершающим ныне всесвятую
память твою.

Радости исполни сердца наша, богоблаженне
отче, во еже пети и славити прославльшаго тя
Христа Жизнодавца; Егоже непрестанно
величаем.

Богородичен: Радуйся, Богоприятная утробо,
радуйся, Престоле Господень, радуйся, Мати
жизни наша, Тя непрестанно величаем.

Светилен:

Многая твоя, о, отче, исправления и яже в Бозе труды и подвиги твоя, пощение и бдение, долу легания и злострадания, нищету и совершенное нестяжание кто изреци возможет; воистинну бо истинен монах показался еси, боголюбезне, тем и мы, любезно твою память чтуще, тя укрепльшаго Бога славим.

Богородичен:

Радуйся, Престоле огнезрачный, радуйся, светильниче свещеносный, радуйся, горо освященная, ковчеже Жизни, святая святых превысшая.

На хвалитех стихиры, глас 2:

Восхвалим, людие, достоблаженную память преподобнаго и богоноснаго Киприана, великаго и преславнаго светильника Христова и богдарованнаго чудотворца, яко он, скончавше странствие земное, восше в обители Царя Небеснаго и зрит тамо красоту неизреченную, соприсчислившись к лику ангелов и святых, поет с ними песнь трисвятую в Троице славимому Богу.

Возрадуемся, братие, празднующе светлую память всеблаженнаго Киприана, / благочестия наставника, проповедника любви Христовой, его же Бог сотвори сосудом избранным

благодати Своей живоносныя, воззовем Ему: моли, отче богонсне, Всещедраго Бога спастися душам нашим.

Преплаженне отче Кипране, вонми гласу душ наших, уповающих на твои милости, яко скорби и нужды превзыдоша главу нашу, и нет исцеления плоти нашей; прииди и помози нам, святую память твою чтящим.

Не забуди и ныне всех, обитающих на месте твоего трудоположнаго жительства, о Киприане богоносе, отче наш, и песнь усердно тебе приносящим ходатайствуй спасение: тя бо, о всеблаженне, молитвенника и предстателя ко Господу стяжавше, надежды не отщетимся, верно тя чтущии.

Слава, глас 8:

Приидите вси вернии, / восхвалим единого от собора отец преподобных Российския земли, / силою духа превозмогшаго немощи плоти; / пастыря мудраго и старца прозорливаго, / молитвенника и чудотворца; / благодаряще Всесильнаго Бога, / даровавшаго нам, якоже и в древняя времена, / сего несокрушимаго ревнителя веры Истинныя, / надежнаго защитника, крепкаго предстателя и помощника: / святаго Киприана, старца богоноснаго.

Слава и ныне, Богородичен: